



Broj:02-04-1205/22

Datum, 12.01.2022.godine

ZAPISNIK
sa 22. redovne sjednice 7. saziva
Općinskog vijeća Doboj Istok

Dvadesetdruga redovna sjednica 7. saziva Općinskog vijeća održana je dana 29.12.2022. godine u zgradi općine Doboj Istok u Klokočnici sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu.

ODSUTNI: Senada Džanić, predsjednica kluba vijećnika SBB – BPS.

Sjednicu je otvorio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Poštovani vijećnici, uvaženi načelnice, pomoćnici načelnika sve vas srdačno selamim i pozdravljam. Otvaram 22. redovnu sjednicu 7. saziva Općinskog vijeća Doboj Istok i prije nego što krenemo zamolio bih tehničkog sekretara da utvrdi broj prisutnih na današnjoj sjednici. Znači, prisutno je 16 vijećnika, a odsutna je Senada Džanić opravdano, što znači da imamo kvorum i možemo da nastavimo sa radom.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Nusret Dautović, predsjedavajući Općinskog vijeća: „Dobili ste Zapisnik sa 21. redovne sjednice 7. saziva Općinskog vijeća Doboj Istok. Ima li neko primjedbi na zapisnik? Ukoliko nema, ko je za ovakav zapisnik?“

Glasanje: ZA – 16, PROTIV – 0, UZDRŽANIH – 0.

VIJEĆNIČKA PITANJA

Nusret Dautović, predsjedavajući Općinskog vijeća: „Ima li vijećničkih pitanja? Ukoliko nema vijećničkih pitanja prelazimo na dnevni red.“

USVAJANJE DNEVNOG REDA

Nusret Dautović, predsjedavajući Općinskog vijeća: „ Za današnji dnevni red planirano je bilo 11 tačaka, ali imamo dopunu dnevnog reda Razmatranje i usvajanje Prijedloga Odluke o izmjeni Odluke za utvrđivanje koeficijenata za plaće nosioca javnih funkcija u općini Doboj Istok. Ko je za dopunu sa ovom tačkom dnevnog reda?“

Glasanje: ZA – 16, PROTIV – 0, UZDRŽANIH – 0.

Ovu bih tačku stavio pod broj 5. a ostale bi se pomjerale. Slažete li se da bude ovako? Ko je za kompletan dnevni red?

Glasanje: ZA – 16, PROTIV – 0, UZDRŽANIH – 0.

Pročitat ću današnji dnevni red:

1. Razmatranje i usvajanje Rebalansa Budžeta općine Doboj Istok za 2022. godinu,
2. Razmatranje i usvajanje Prijedloga Budžeta općine Doboj Istok za 2023. godinu,
3. Razmatranje i usvajanje Prijedloga Odluke o izvršenju Budžeta općine Doboj Istok za 2023. godinu,
4. Razmatranje i usvajanje Prijedloga Odluke o utvrđivanju pripadnosti nekretnina u Katastarskoj općini Stanić Rijeka,
5. Razmatranje i usvajanje Prijedloga Odluke o izmjeni Odluke za utvrđivanje koeficijenata za plaće nosioca javnih funkcija u općini Doboj Istok,
6. Razmatranje i usvajanje Prijedloga Odluke o imenovanju Komisije/Savjeta za bezbjednost saobraćaja
7. Razmatranje i usvajanje Prijedloga Odluke o davanju saglasnosti na Pravilnik o unutrašnjoj organizaciji općinskih službi za upravu općine Doboj Istok i na četiri Pravilnika o izmjenama i dopunama Pravilnika o unutrašnjoj organizaciji općinskih službi za upravu općine Doboj Istok,
8. Razmatranje i usvajanje Prijedloga Odluke o dopuni Odluke o osnivanju Zajedničkog pravobranilaštva za općine Čelić i Doboj Istok,
9. Razmatranje i usvajanje Prijedloga Rješenja o davanju prethodne saglasnosti na imenovanje direktora JP Veterinarska stanica d.o.o. Doboj Istok,
10. Razmatranje i usvajanje Dokumenta okvirnog budžeta općine Doboj Istok za period 2023 – 2025. godina,
11. Razmatranje i usvajanje Prijedloga Programa rada Općinskog vijeća Doboj Istok za 2023. godine,
12. Razmatranje i usvajanje Programa i plana rada Općinskog načelnika za 2023. godinu.

REALIZACIJA DNEVNOG REDA

1. Razmatranje i usvajanje Rebalansa Budžeta općine Doboj Istok za 2022. godinu.

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Pozdravila bih i poselamila sve prisutne, a ujedno svim građanima i vama takođe želim sve najbolje u 2023. godini. Što se tiče Rebalansa budžeta ja moram staviti upitnik na neka konta, pa molim službe i molim načelnika da mi objasne neke stvari koje ću u ovoj diskusiji da iznesem. Kada je u pitanju konto 722435, a odnosi se na rentanje, planirano je budžetom 75.000, a rebalansom minus 15.000, to mogu da shvatim da se vjerovatno nešto nije naplatilo, pa bi možda bilo dobro da se pojasni. Konto 722442 održavanje i izgradnja javnih skloništa budžetom nije predviđeno, međutim u rebalansu je 8.700 pa pojašnjenje na šta se odnosi. Što se tiče konta 614517 podsticaj za projekte u poljoprivredi, budžetom planirano 50, rebalansom minus 50, odnosno niti jedan fening nije potrošen, pa bih ja isto tako da se neko iz službe očituje, da vidimo o čemu se ovdje radi. Konto 614239 ostali grantovi pojedincima budžetom planirano 7.000, a rebalans 16.000, tu možemo vidjeti da je nešto iskršlo, ali bi trebalo pravilno u nekim okvirima 20, 25 ili 30% planirati kada je u pitanju budžet za 2023. godinu. Takođe imamo konto 822411 vidimo dionice Komunalnog preduzeća, pretpostavljam, se nisu klupile i one su prenesene u 2023. godinu. Najveći upitnik stavljam na konto 621614, rekonstrukcija zgrada, budžetom je planirano 350.000, a u rebalansu minus 380.000. Ja nisam ekonomski stručnjak i ne razumijem, planiraš 350.000, a rebalansom još 30.000 si u nekom minusu i ukupno je minus 30.000. Meni to nije jasno, pa ako mogu kratka pojašnjenja.“

Kemal Bratić, općinski načelnik: „I ja bih iskoristio priliku da sve poselamim i pozdravim i da prije svega zaželim uspješan rad, kao i uspješnu i beričetnu 2023. godinu. Mi ćemo vama dati pismeni odgovor na ova vaša pitanja. Ono što treba da znate kada se poredi budžet i rebalans i ono na šta ću se ja osvrnuti nisu pitanja koja ste vi postavili nego ću se osvrnuti na prihodovnu stranu, a to je da smo prihod u budžetu općine Doboj Istok koji je bio planiran 4.300.000 povećali za 1.200.000 i to je ono što je dobro u Rebalansu budžeta. Ja se nadam da će u narednom periodu budžet biti i veći, jer ovo je najveći budžet od osnivanja općine Doboj Istok i meni je drago što smo mi zajedno ostvarili jedan ovakav budžet. Ono što je najbitnije jeste da su sva sredstva trošena u skladu sa Zakonom o budžetima tako da morate porediti plan i sadašnji rebalans, pa se zato pojavljivao, kao što rekoste, minus. Kada se radi o poljoprivredi planirali smo sa federalnim

ministarstvom izgradnju tržnice i nije ostvareno, pa je to zato. Znači sve ono što nije ostvareno na neki način je u minusu. Vezano za civilnu zaštitu ne možemo planirati koliko će biti za skloništa kada ljudi prave objekte, znači neko je uplatio ili za rentu, jer je to promjenjiva materija. Zato između ostalog i radimo budžet i usklađujemo prihodovnu sa rashodovnom stranom. Ja vam svima čestitam na ovolikom budžetu u 2022. godini. Ono što mi je posebno drago jeste konstantni rast prihoda na dohodak u našem budžetu. Ako poredimo 2012. godinu kada sam preuzeo prvi mandat kada je bilo 300.000 od poreza na dohodak, a plan za narednu godinu je 1.400.000 i to je pokazatelj da općina Doboj Istok stvara ambijent za naše privrednike da oni šire svoje biznise, da zapošljavaju nove radnike i to je ono na čemu mi moramo raditi i to je ono što je naš glavni zadatak. Ja se iskreno nadam da ćemo mi ovaj budžet u nekom narednom periodu, ako Bog da, još popraviti i da će on biti još veći, naravno uz Božiju pomoć i ako budemo zdravi i živi da na tome radimo.“

Emira Karić, predsjednica kluba vijećnika SDP: „ Iskreno da kažem ja sam se nadala da će u Rebalansu budžeta biti planirana jednokratna pomoć i da je to sindikat već uradio, ali eto nije. Ja bih samo molila službu za poljoprivredu da bar ovaj podsticaj za poljoprivrednu proizvodnju objasni zašto je 50, a nije potrošeno, ako može.“

Kemal Bratić, općinski načelnik: „ To je planirano tako i vodilo bi se na kontu poljoprivede. Planirali smo da mi uložimo 50.000, a 50.000 federalno ministarstvo. Isto kao što smo u budžetu ugradili 120.000 općina Doboj Istok, a 120.000 Fond za zaštitu okoliša rekonstrukcija Doma zdravlja Doboj Istok gdje se radi stolarija, krov, stiropol, kotao za pelet itd. Moram se osvrnuti za jednokratnu pomoć. Znači principijelno sam bio protiv toga. Jesam za povećanje plata uposlenicima sukladno našim mogućnostima. Međutim po meni ta preporuka na neki način nije dobra. Obrazložit ću i navesti dva primjera. Nije u redu da pomoćnik načelnika i načelnik dobije isti iznos kao i spremačica koja je zaposlena u Općini Doboj Istok. Zbog toga sam bio protiv toga. Drugi razlog je što nije u redu da penzionerima damo po 100 KM, a onima koji rade damo po 1080 KM. Znači o svemu ostalom mogu pričati. Mi smo napravili sporazum sa sindikatom i potpisali određene stvari, a ovo nismo uobzirili, jer sam ja to odbio i ja ću to uvijek braniti. Znači da je bilo u pitanju 20 KM ja bih bio protiv toga.“

Emira Karić, predsjednica kluba vijećnika SDP: „ Vidite, gospodine načelniče, mi to možemo gledati i ovako i onako. Krenulo se u davanje jednokratne pomoći na nivou Federacije, odnosno u Zavodu za zdravstveno osiguranje. Samo jedan čovjek u državi da je primio iz budžeta jednokratnu pomoć svi ostali su diskriminirani. Znači ko je god krenuo u ovu priču morao je znati da se ovdje radi o diskriminaciji. Tako da podržavam da li će to biti zaduženje kao što je juče rečeno u ZE-DO kantonu ili šta bilo, jer krenulo se u priču ako je u pitanju realan ili drugi sektor hajmo tu priču izgurati do kraja, a stvarno se radi o diskriminaciji. Znači ne može jedna služba dobiti, a druga ne dobiti i zato sam očekivala da će se to u Rebalansu naći.“

Nusret Dautović, predsjedavajući Općinskog vijeća: „ Hvala lijepo Emira. Javlja li se još neko za riječ? Ukoliko se niko ne javlja ko je za ovakav Rabalans budžeta?

Glasanje: ZA – 11, PROTIV – 0, UZDRŽANIH – 5.

Konstatujem da je 11 za, niko protiv, a 5 uzdržanih.

2. Razmatranje i usvajanje Prijedloga Budžeta općine Doboj Istok za 2023. godinu

Nusret Dautović, predsjedavajući Općinskog vijeća: „ Javlja li se neko za riječ?“

Emira Karić, predsjednica kluba vijećnika SDP: „Ja ću vrlo kratko vezano za tri amandmana koja sam uložila. Očekujem izjašnjenje za ili protiv. Smatram da su amandmani nekako svrsishodni, pa možda da ih još malo pojašnjim. Što se tiče peći za Dom kulture u Mjesnoj zajednici Brijesnica Velika i to smatram neophodim. Sada imamo jedno dešavanje i smatram da bi ta peć na pelet bez razvođenja radijatora mogla postići određenu temperaturu i da bi se u tom Domu kulture i u hladnijim danima mogli planirati i održavati neki kulturni ili javni događaji. Mislim da ovaj budžet može podnijeti taj amandman ili moju inicijativu. To je jedini, ako spomenem i Mjesnu zajednicu Lukavica Rijeka, dom kulture koji daje bar kakve takve uvjete da se planira nešto na našoj općini za održavanje. Sada ćete vi reći šta si ti to planirala sa 10.000, ja stvarno smatram da bi trebalo izdvojiti ovaj iznos, znači subvencija članskih karti, da li su one skupe, da li nisu, ja u to istraživanje nisam išla. Međutim moram sa tačke gledišta jednog pedagoga reći, jer svi smo mi pedagozi i nastavnici i ostali, da se nalazim u velikom problemu kada je u pitanju obrazovanje. Uključivanjem djece u sport na

vrijeme ćemo rješavati te probleme, a ovo je minimum koji možemo dati kao lokalna zajednica. Mislim da se sve lokalne zajednice moraju pobrinuti o ovom problemu. Neko je drugačije vrijeme došlo, sistemi vrijednosti su sasvim drugačiji i osjete se veliki problemi u razrednoj nastavi, u osnovnom školovanju, a kako će to biti dalje to ne znam. Znači dolaze generacije koje malo drugačije reaguju i na autoritet i na ostalo. Ja lično svojim roditeljima sugerisem da se svako dijete uključi u barem jedan sport. Hajmo ih nekako motivisati sa subvencijom ovih članskih karata, pa na kraju krajeva i pomoći da se nekako te linije prevoza djeci omoguće kako bi se djeca na neki način odvojila od onog što znamo šta nam čini taj virtualni svijet. To je znak motivacije za razvoj sporta na općini Doboj Istok. Ja bih ovo mogla još šire i duže, ali neću više. Smatram da je pravedno da se i ovaj nevladin sektor koji sam pomenula uključi u budžet.“

Hasan Hasančević, predsjednik kluba vijećnika SDA: „ Sve ću iskreno da poselamim i pozdravim. Što se tiče prijedloga Budžeta klub vijećnika SDA će podržati. Ne znam da li će načelnik prihvatiti ili odbiti ovaj amandman što se tiče Sportskog saveza i klubova. Znači mi smo općina koja ima najviše uključene djece u sport procentualno na Tuzlanskom kantonu. Jednu stvar da znate za informaciju sve i jedan sportski kolektiv koji egzistira na području općine Doboj Istok prima svu djecu koja nisu u stanju da plate članske karte. Znači, ni jedan do sada, jer nije mi se ni jedan roditelj javio da mu je dijete otišlo sa stadiona ili dvorane, jer nije imalo da plati. Čak smo imali situacija da su jedno vrijeme nešto plaćali, pa stali, pa su treneri zvali roditelje da dolaze, jer mi imamo prećutan dogovor da sve i jedno dijete koje ima želju da tenira ima obezbijeđeno besplatno treniranje i ne vidim svrhu amandmana na ovaj način. Evo u prijedlogu Budžeta je povećanje Sportskom savezu, a imamo povećanje sportskih klubova unutar Sportskog saveza. Od ove godine imamo klub Gard, klub borilačkih sportova, brazilske džiju džice koja već ostvaruje sportske rezultate, a sjedište tog kluba je u Lukavici Rijeci što meni itekako imponuje, jer smo poklopili sve mjesne zajednice sa tim klubovima. Evo tako ima i Streljački klub, pa treba poraditi malo da se neke sekcije otvore i u Maloj Brijesnici kada dvorana završi. Nastojat ćemo da se i u Stanić Rijeci počne raditi i samim tim da svi koji žele da treniraju imaju te uslove i čak besplatno ko nema tih uslova.“

Emira Karić, predsjednica kluba vijećnika SDP: „ Kada je u pitanju neka tema možda je dobro negdje drugo raspraviti o toj temi da se vidi u kojem smjeru ide. Što se tiče općine Doboj Istok meni je jako drago, jer ja taj podatak nisam imala. Međutim ja kada gledam razrede u Područnoj školi Brijesnica Mala ja vam garantujem da je oko 10% djece uključeno u sport i to je malo. Ja neću gledati krovno da li je više ovdje ili ondje. Malo je i 50%. Ovog sam stava da se sva djeca moraju baviti sportom, jer ima razloga. Tu se uči autoritet, uči se razvoj i kognitivno mišljenje itd. Da ne kažem stvarno dolaze sve veći i veći problemi, jer znamo šta je problem, djeca su na internetu i sistem vrijednosti sasvim je drugačiji i totalno opada. Neće više prosvjetni radnik biti u mogućnosti autoritet u školovanju. Naravno i obrazovni sistem će se promijeniti, živi bili pa vidjeli i to će biti jako skoro. Iznenadit ćemo se kako ćemo brzo preći na neki novi sistem. Ovdje se ne radi da neki roditelji i neka djeca ne mogu i ja razumijem svi mi imamo taj socijalni senzibilitet, ali hajmo nekako uz pomoć besplatnih karata za neku djecu i roditelje da dođu na ideju hajde kada je besplatno krenut ću, pa će vjerovatno da krene i njegov prijatelj i komšija itd. To je bio moj cilj, neka motivacija za ta sredstva, a možda se ta sredstva neće ni potrošiti pa ćemo rebalansom biti minus 8.000. To sam ja otprilike vidjela koliko bi to bilo članskih karti smatrajući da je to samo doprinos motivaciji.“

Kemal Bratić, općinski načelnik: „ Moram se prvo osvrnuti na prethodnu tačku i teško mi je shvatiti da neko ne glasa za ostvarenje ovakvog fantastičog budžeta za 2022. godinu gdje smo prebacili 1.200.000. To mi je zbilja teško pored ovih sitnih pitanja i nekakvih nejasnoća. Dugo ću o tome razmišljati i ne znam da li ću ikada shvatiti da neko ne glasa za nešto što smo napravili u 2022. godini i uložili u sve mjesne zajednice značajan dio sredstava u izgradnji naše infrastrukture. Kada se radi o budžetu koji je planiran za 2023. godinu predložio sam ga onako malo oprezno, jer pokazatelji su da će prihodi od indirektnih poreza biti u blagom padu i evo i ja sam predložio da to bude manji iznos iako obično kada planiramo budžet za narednu godinu ravnamo se po onom budžetu u tekućoj godini. Vidjeli ste tamo da je predloženo oko 4.900.000 KM. Mi ćemo njega vjerovatno ostvariti i ako Bog da i prebaciti u narednoj godini zajedničkim snagama, našim zalaganjem i našim trudom. Ono što ću reći je da kolegica Emira radi to što radi i za mene je to najljepši posao koji jedan čovjek može da radi, a to je da prenosimo znanje. Međutim ne slažem se sa tim da ćemo mi nekoga stimulisati na taj način da damo 10 KM mjesečno po djetetu da bi dijete nešto treniralo. Prvenstveno svi znamo šta su stupovi odgoja jednog djeteta, to je broj 1. porodica, 2. škola i 3. društvo. Ako u jednom od tih stupova imamo malo fula onda je to veoma teško bez obzira koliko bi mi platili. Ja ću se osvrnuti na globalan budžet, pa ću se naravno izjasniti o predloženim amandmanima naravno onim koji su predloženi kako treba. Znači ovdje ima amandmana koji nisu ispoštovali formu, pa ne znam da li treba da se izjašnjavamo o pomenutim uopšte. Kada

se radi o prihodovnoj strani ono što je najbitnije jeste da ostvarimo onaj prihod koji smo planirali i mi ćemo ga ostvariti. Kada se radi o rashodima vidjeli ste tamo da smo određene stavke povećali, da smo povećali izdvajanja za dječije obdanište koje je preko 200.000 KM. Poređio sam neki dan 2012. godine mi smo za Dječije obdanište izdvajali 50.000 KM, a ono je sada preko 200.000 i kada mi to podijelimo na broj polaznika u obdanište na njih oko 60, izađe da preko 3.000 mi subvencioniramo roditeljima, a i to je subvencija. Znači mi plaćamo na neki način obdanište za te naše polaznike. Zašto? Omogućujemo ljudima da rade, omogućujemo da rade oba roditelja i dajemo jedan dio sredstava, a oni uplaćuju ono što uplaćuju, tako da je i to na neki način subvencija. Povećali smo tamo za Crveni križ, povećali smo za Sportski savez i povećali smo za mjesne zajednice. Šta je bitno? Bitno je da iz godine u godinu povećavamo davanja, odnosno vraćamo sredstva tamo odakle su ona došla, a to je našim građanima, našim udruženjima, našim mjesnim zajednicama mimo projekata koje mi radimo u svim mjesnim zajednicama. Kada se radi o amandmanima moram reći da ova dva amandmana od uvaženog kolege i mog adeša Skopljaka nisu potpisana, a nije ni zaglavljeno kako treba i ja ne znam da li je ovo stvarno Kemo napisao. Amandmani nisu loši. Ovo vezano za vozilo ja znam da su sredstva za nabavku vozila za Dom zdravlja obezbijeđena od Vlade Tuzlanskog kantona. Općina Doboj Istok je spremna da pomogne da namirimo da kupite još jedno vozilo. Znači imate dva nova vozila i mislim da će to biti sasvim dovoljno. Ovo sam obrazložio kada se radi o Sportskom savezu mislim da mi sasvim dovoljno izdvajamo sredstava i bude to možda i preko 100.000 i sada je planirano negdje 80.000. Mi svakom klubu posebno pomognemo da obilježavanje nekog značajnog turnira, manifestacije, pa ih nagradimo tamo za Dan općine i za Dan brigade kada prave turnire, tako da mi puno više damo nego ovako. Zašto mi se još ovaj amandman ne sviđa? Nemamo mi egzaktnih podataka, koliko ima članova u jednom klubu, koliko u drugom, koliko u trećem, kolika je članarina, da li se plaća članarina itd. tako da mi je ovaj amandman neprihvatljiv. Antifašisti – ovo sam malo provjerio, tu registracija još nije promijenjena u rukovodstvu, a ne znam ni ko je formalno pravno predsjednik tog udruženja, ali im možemo pomoći ovako ukoliko budu nešto obilježavali tako da mi je i taj amandman neprihvatljiv. Mi već izdvajamo za dosta udruženja, a svako udruženje je antifašista i lovci i ribari, a da ne govorim o ovim našim boračkim udruženjima od posebnog značaja. Svi smo mi antifašisti i ja to tako gledam i doživljavam. Kada se radi o trećem amandmanu uvažene vijećnice Emire ne može biti stavka 6.000 za jednu mjesnu zajednicu. Da ste predložili za sve mjesne zajednice ja bih to prihvatio, ali da izdvajamo za jednu mjesnu zajednicu za nabavku kotla, a da li taj kotao košta 6.000, da li zadovoljava, koliko kilovata treba da ima taj kotao, koja je površina. Znači ovo je po meni amandman, tek toliko da je amandman. Ja ga ne doživljavam, ali ne morate vi ulagati amandman, ja sam o tome već razmišljao i mi ćemo to ako Bog da uraditi. Isto kao što je uvaženi vijećnik Haris prošle godine uložio amandman za onaj put, pa sam ja obećao i eno namirili smo više nego što je Haris tražio svojim amandmanom i završili smo taj put. Tako da mi je i ovaj amandman neprihvatljiv. Ono što ja predlažem vezano za predloženi budžet, napravio sam jedan previd, jeste da ubacimo udruženje Emmaus Doboj Istok za finansiranje jedne majke u Srebrenici, jer su mi rekli da treba oko 1000 KM za smještaj jedne majke iz Srebrenice u novi kompleks koji su napravili i dosta općina će to uraditi na ovakav način i planirati u budžetu i ja bih vas zamolio da imate obzira. Ja ću predložiti da se sa stavke 821222 putevi i mostovi skine 12.000 KM, a da se na kontu 614324, znači 20. Udruženje Emmaus, a projekat se zove „Ljubav za majke Srebrenice“ gdje bi svaki mjesec davali isključivo za brigu za jednu majku iz Srebrenice i to bi finansirala Općina Doboj Istok. Znači ova dva amandmana su po meni nepravilno napisana i nisam ih Bog zna ni razmatrao, a ova tri od uvažene kolegice Emire su mi neprihvatljiva, ali će vjerovatno biti kroz naš budžet ostvareni. Znači nije sporno, ni taj kotao, jer treba nam kotao i tamo i ovdje u Domu kulture u Klokotnici staviti u funkciju, u Lukavici Rijeci da imamo, ako ništa kada imamo ove predizborne skupove da nam nije hladno i da se ne smrzavamo i da se poslije svake kampanje ne razbolimo.“

Emira Karić, predsjednica kluba vijećnika SDP: „ Replika. Kažete načelnice, budžet se vraća građanima. Dobro, budžet se i mora vraćati građanima. Zašto treba služiti budžet? Za kupovinu ruku i za kupovinu glasova? Znači budžet se u velikim procentima vraća građanima i to je jasno svima i to ne treba uopće napominjati. Što se tiče iznosa u tim amandmanima, mi smo imali danas tačku rebalans, pa vidimo kolika su konta plus, minus i je li treba nekome spočitati što nije u fening kao što tražite od amandmana da je 0,90. Znači postoji rebalans i ako je peč 5.900, rebalansom ćemo biti minus ili plus ili šta već. Malo je to meni prodavanje magle i ja nisam na tom nivou, znači da se trebaju amandmani obrazložiti itd. Što se tiče kotla za sve mjesne zajednice, pa jesmo li mi toliki rasipnici? Šta treba Mjesnoj zajednici Brijesnica Mala gdje će staviti taj kotao? Ovo je samo interventna stvar bila da bi svi mještani Doboj Istoka mogli služiti prostoriju koja je zahvaljujući i građanima Doboj Istoka i Brijesnice Velike i Mjesne zajednice Brijesnice Velike, jer koliko toliko je ona prostorija uslovna i nećemo zatvarati oči pred tim stvarima. Sve ostale upitne su i što se tiče i čišćenja i održavanja i nekih radnji koje se moraju uraditi. Znači po meni je Dom kulture u Mjesnoj zajednici Brijesnica

o obdaništu tačno je da je povećano, gledao sam, ali ako pogriješim možete me ispraviti 2012. godine je bilo 60.000 za dječije obdanište i bilo je 10 djece. Sada je toliko i hvala Bogu i ja sam to jedne prilike pohvalio. Kada se sabere i tada se izdvajalo skoro 5.000 po djetetu za sufinansiranje. Napredak ima, tehnologija raste. Ja sam nekada imao telefon malu nokijicu sada imam moderan telefon i naravno da će biti bolje i treba da bude bolje i treba čestitati ljudima koji rade na tome. Budžet je odličan i mogu o njemu pričati dva sata koliko je dobar, ali ne mogu, jer jednostavno nema nikakvih uporednih pokazatelja. Spomenem, jer prije je reprezentacija uvijek bila aktuelna, šta smo povećali, za koliko smo povećali u odnosu na procjenu ostvarenja budžeta za 2022. godinu, u odnosu na rebalans budžeta 2022. godine, koliko smo povećali budžet i koliko smo ga smanjili i zbog čega. To je 5 – 6 rečenica i to su razlozi o kojima govorim. Od mene lično čestitke i nemam nikakvih dilema za ovakav prihod i ovakav napredak budžeta u općini Doboj Istok.“

Emira Karić, predsjednica kluba vijećnika SDP: „ Replika. Kažete u nekim lokalnim zajednicama se više-manje, sve su to varijacije i ja sam slušala Radio Gračanicu, sjednicu Općinskog vijeća i imaju inicijativu koju upućuju prema ministarstvu Tuzlanskog kantona. Znači moguće je da vijećnik uputi inicijativu ministarstvu, a mi ovdje nemamo pravo uputiti ni načelniku, ni službama. Nemamo pravo, jer još niste uskladili Poslovnik. Što se tiče da sam vijećnica iz Brijesnice Male, pa nisam tražila za Brijesnicu Malu i naravno da sam percipirala sve domove kulture i dom kulture u Brijesnici Maloj još uvijek se može zagrijavati zbog manjih prostorija grijalicom. Evo ja sekretaru mogu uručiti donaciju, ako je potrebno jedne grijalice za dom kulture u Brijesnici Maloj.“

Nusret Dautović, predsjedavajući Općinskog vijeća: „ Hvala lijepo. Ako se više niko ne javlja za riječ, zaključujem ovu tačku. Stavljam na glasanje Prijedlog Budžeta uz prijedlog vezan za Emmaus. Ko je za?

Glasanje: ZA – 10, PROTIV – 0, UZDRŽANIH – 4. (Zerina Subašić i Mehmed Mehinović su napustili sjednicu (opravdano).

Emira Karić je zatražila pauzu od 10 minuta.

Predsjedavajući je dao pauzu od 10 minuta.

3. Razmatranje i usvajanje Prijedloga Odluke o izvršenju Budžeta općine Doboj Istok za 2023. godinu

Nusret Dautović, predsjedavajući Općinskog vijeća: „ Prije nego što nastavimo samo da izvijestim da je Mehmed Mehinović iz opravdanih razloga napustio sjednicu, jer ima slučaj u porodici. Javlja li se neko za riječ po ovoj tački?“

Kemal Bratić, općinski načelnik: „ U razgovorima sa Sindikatom državnih službenika i namještenika općine Doboj Istok ja ću predložiti Općinskom vijeću da u članu 17. u pasusu koji reguliše osnovicu i da osnovicu uskladimo sa nedavnom odlukom federalne Vlade i da osnovica bude 385 i da se bod koji je bio 1,15 smanji na 1,05. Na taj način bi povećali plate uposlenicima općine Doboj Istok, prateći sve diskusije vijećnika i pozicije i opozicije na inflaciju, pogotovo na ove procjene koje nas očekuju u narednom periodu.“

Nusret Dautović, predsjedavajući Općinskog vijeća: „ Hvala lijepo načelniče. Javlja li se još neko za riječ? Ko je za ovakvu Odluku o izvršenju budžeta općine Doboj Istok sa izmjenom u članu 17. koju je predložio načelnik?“

Glasanje: ZA –14, PROTIV – 0, UZDRŽANIH –0.

4. Razmatranje i usvajanje Prijedloga Odluke o utvrđivanju pripadnosti nekretnina u Katastarskoj općini Stanić Rijeka

Nusret Dautović, predsjedavajući Općinskog vijeća: „ Javlja li se neko za riječ?“

Haris Sinanović, predsjednik kluba vijećnika SDP-SBiH: „ Da pozdravim sve prisutne i zaželim sretnu Novu godinu i kao što reče kolega najviše zdravlja, pa ostalo. Ne bih dužio vezano za ovo, jer sam postavljao pitanje načelniku na Kolegiju, ali osjećam potrebu da ispred građana Stanić Rijeke koji su veoma zabrinuti, jedan dio građana koje sam ja kontaktirao vezano za ovu tačku dnevnog reda, pa radi građana Stanić Rijeke tražim od načelnika obrazloženje da je to samo Odluka o utvrđivanju prava vlasništva radi knjiženja u gruntovnicu. To

je u redu, jer je i do sada bila nosilac imovine na KKI izvatku. Znači, samo da načelnik izađe i da obrazloženje da nisu u planu nikakvi radovi tamo, jer se ljudi boje da se tamo planira neki kamenolom i s razlogom su zabrinuti.“

Kemal Bratić, općinski načelnik: „Znači mi danas razgovaramo o ovome i očekujte, ako Bog da, na svakom narednom Općinskom vijeću da će biti sličnih tačaka. Zašto smo ovo pokrenuli? Pokrenuli smo prvenstveno da nam se ne bi desila Vega i da Vijeće donese odluku da krenemo u proceduru da pravobranilac traži da svu onu imovinu čiji je pravni nasljednik Općina Doboj Istok uknjižimo na Općinu Doboj Istok, jer sve dok je ne uknjižimo ona nije naša. Šta nam se tamo dešava? Tamo sada imamo vakum prostor i ono nije ničije, formalno pravno nije ničije. Jedini razlog zašto danas ovo donosimo je ovo, a šta će poslije biti ja ne znam. Sve što poslije bude dolazilo u budućnosti doći će na Općinsko vijeće i sa svakom lokalnom zajednicom će se razgovarati. Da li će neko tamo da to radi? Ja ne znam, vjerujte da ne znam, jer nisam vidovit. Ne bih da otvaramo, jer to nije uopšte tema, tema je da mi uknjižimo da bude naše vlasništvo. Hoćemo li mi to kome prodati ili dati pod koncesiju, ne znam ni to. Sve ono što bude neko tražio, doći će ovdje pred vas i da se Općinsko vijeće izjasni, jer načelnik nije nadležan za to. Mene je iznenadilo zašto vi niste prije reagovali kao vijećnik iz Stanić Rijeke, jer imate do ovoga dva kamenoloma i niko nije reagovao. Isto to ljudi rade, ali očito je to neka druga igra i ja ne bih ulazio u to. Molim vas da danas pričamo samo o ovome i da ovo riješimo i da damo pravobraniocu zeleno svjetlo da uknjižimo na Općinu Doboj Istok.“

Nusret Dautović, predsjedavajući Općinskog vijeća: „Javlja li se još neko za riječ? Niko ne valja i stavljam na glasanje ovu tačku dnevnog reda. Ko je za?“

Glasanje: ZA – 14, PROTIV – 0, UZDRŽANIH –0.

5. Razmatranje i usvajanje Prijedloga Odluke o izmjeni Odluke za utvrđivanje koeficijenata za plaće nosioca javnih funkcija u općini Doboj Istok

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Ova tačka je zakonska regulativa i sve je navedeno u obrazloženju, znači Zakon o platama u Federaciji je rekao svoje zato da svako suprotno izjašnjavanje osim za bilo bi napuštanje okvira zakona, tako da će klub vijećnika SDP biti za ovu tačku dnevnog reda.“

Nusret Dautović, predsjedavajući Općinskog vijeća: „Javlja li se još neko za riječ? Ukoliko se niko ne javlja za riječ dajem na glasanje ovu tačku dnevnog reda. Ko je za?“

Glasanje: ZA – 14, PROTIV – 0, UZDRŽANIH –0.

6. Razmatranje i usvajanje Prijedloga Odluke o imenovanju Komisije/Savjeta za bezbjednost saobraćaja

Nusret Dautović, predsjedavajući Općinskog vijeća: „Javlja li se po ovoj tački neko za riječ?“

Hasan Hasančević, predsjednik kluba vijećnika SDA: „Ovdje se radi o Komisiji za bezbjednost saobraćaja na lokalnim putevima. Mi smo imali to na Komisiji za dodjelu općinskih priznanja, izbor i imenovanja i prihvatili to kao i sljedeću tačku za izbor direktora i sve je obavljeno u skladu sa Poslovníkom i pravilnikom. Zamolio bih Komisiju koja će danas biti izglasana da rade poslove, jer smo na Kolegiju imali nekih problema prilikom udesa itd. i došli smo do saznanja da je Komisiji istekao mandat i zamolio bih ovu Komisiju da radi kako treba. Da kažem i za sljedeću tačku za direktora Veterinarske stanice lahko je nadmašiti prošlog i da to bude sve u skladu sa propisima.“

Nusret Dautović, predsjedavajući Općinskog vijeća: „Hvala lijepa Hasanu. Javlja li se još neko za riječ? Ukoliko se niko ne javlja ko je za prijedlog ove Odluke?“

Glasanje: ZA – 14, PROTIV – 0, UZDRŽANIH –0.

7. Razmatranje i usvajanje Prijedloga Odluke o davanju saglasnosti na Pravilnik o unutrašnjoj organizaciji općinskih službi za upravu općine Doboj Istok i na četiri Pravilnika o izmjenama i dopunama Pravilnika o unutrašnjoj organizaciji općinskih službi za upravu općine Doboj Istok,

Nusret Dautović, predsjedavajući Općinskog vijeća: „Javlja li se neko za riječ? Ukoliko se niko ne javlja ko je za ovakav prijedlog Odluke?

Glasanje: ZA – 14, PROTIV – 0, UZDRŽANIH – 0.

8. Razmatranje i usvajanje Prijedloga Odluke o dopuni Odluke o osnivanju Zajedničkog pravobranilaštva za općine Čelić i Doboj Istok

Nusret Dautović, predsjedavajući Općinskog vijeća: „Javlja li se još neko za riječ po ovoj tački? Ukoliko se niko ne javlja ko je za prijedlog Odluke?

Glasanje: ZA – 14, PROTIV – 0, UZDRŽANIH – 0.

9. Razmatranje i usvajanje Prijedloga Rješenja o davanju prethodne saglasnosti na imenovanje direktora JP Veterinarska stanica d.o.o. Doboj Istok,

Nusret Dautović, predsjedavajući Općinskog vijeća: „Javlja li se još neko za riječ? Ukoliko se niko ne javlja ko je za prijedlog ovog Rješenja o davanju saglasnosti?

Glasanje: ZA – 14, PROTIV – 0, UZDRŽANIH – 0.

10. Razmatranje i usvajanje Dokumenta okvirnog budžeta općine Doboj Istok za period 2023 – 2025. godina,

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Ja bih voljela da me neko ispravi, međutim čini mi se da je prvi puta ovakva tačka dnevnog reda. Meni je to jako dobra stvar da se napravi neki okvirni budžet, zato što je dobro planirati i pretpostaviti plan unaprijed kako bi se vraćali na eventualno ostvareno i ono što nije ostvareno. Ovaj dokument je sadržajan i iskrena ću biti mislim da bi ovako trebao biti i prijedlog budžeta sa svim tim narativnim dijelovima, jer lakše je razumjeti sadržaj, odnosno građu ove tačke dnevnog reda.“

Nusret Dautović, predsjedavajući Općinskog vijeća: „Hvala lijepo Emira. Javlja li se još neko za riječ? Ukoliko se niko ne javlja dajem na glasanje Dokument okvirnog budžeta. Ko je za ovakav Dokument?“

Glasanje: ZA – 14, PROTIV – 0, UZDRŽANIH – 0.

11. Razmatranje i usvajanje Prijedloga Programa rada Općinskog vijeća Doboj Istok za 2023. godine,

Nusret Dautović, predsjedavajući Općinskog vijeća: „Javlja li se neko za riječ?“

Emira Karić, predsjednica kluba vijećnika SDP: „Što se tiče ove tačke mi smo na Kolegiju imali samo jednu dopunu da u mjesecu martu bude tačka izvještaji komisija koje djeluju pri Općinskom vijeću. Smatrala sam da je tačka bila dobra u prethodnim godinama, međutim ne znam zbog čega je ona, čini mi se, dvije godine izostala iz programa rada. Sada smo je ponovo vratili smatrajući da bi to bio određeni stimulans na rad tih komisija kao tijela Općinskog vijeća za koje smatram zaista da bi trebale da budu svrsishodne. Opet ću govoriti o nekom motivu, vi ste vidjeli na mejl je stigao zapisnik, čak se ne može više održati sastanak Komisije za finansije i problem je to. Znači neki motiv se mora stvoriti i trebao bi biti 100% odziv, ali uvijek ima neko koga nešto spriječi. Međutim, ovo je, iskrena ću biti i sama ću krenuti od svoje komisije, evidentan nerad komisija. Kako da to stimulišemo? Motivacija je čudna stvar i evo načelnik je u tački o budžetu govorio da se ne mora baš motivisati, a ne znamo kako više možemo koga motivisati. Radim sa učenicima i nekada je čudno kako

učenici odgovore za neku motivaciju za koju bih ja mislila da možda čak nije vrijedna ni spomena. Tako da moramo stvarno shvatiti ove komisije i ja sam planirala krenuti sa ozbiljnim radom. Bili su neki principi ko htio priznati ili ne htio. Smatram da nije fer da se neke komisije organizuju i vrijedno rade, a u konačnici nikome ništa, pa da se to negdje prikaže, jer u martu nećemo imati Bog zna nekog prikaza, ali ćemo možda u martu iduće godine, ako bude isto, imati i krenuti sa malo ozbiljnijim radom.“

Nusret Dautović, predsjedavajući Općinskog vijeća: „Hvala lijepo. Javlja li se još neko za riječ po ovoj tački? Ko je za ovakav Prijedlog Programa rada Općinskog vijeća?“

Glasanje: ZA – 14, PROTIV – 0, UZDRŽANIH – 0.

12. Razmatranje i usvajanje Programa i plana rada Općinskog načelnika za 2023. godinu.

Nusret Dautović, predsjedavajući Općinskog vijeća: „Javlja li se još neko za riječ po ovoj tački? Ukoliko se niko ne javlja ko je za ovakav Program?“

Glasanje: ZA – 14, PROTIV – 0, UZDRŽANIH – 0.

Zahvaljujem vam se na konstruktivnom radu na sjednici i pozivam vijećnike i sve prisutne u Emos trade.“

Sjednica je završena u 11,15 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI
OPĆINSKOG VIJEĆA
Nusret Dautović

Zapisnik je usvojen na 23. redovnoj sjednici Općinskog vijeća Doboju Istok održanoj dana 26.01.2023. godine.

U Klokočnici, dana 26.01.2023. godine

Zabilješku sačinio
Omer Hadžić, sekretar Općine